

პოპუნი

დავით ქართველიშვილი



თბილისი
გამომცემლობა აზრი
2001

ავტორი მადლობას უძღვნის ბიორაბი ზოლაგრაღიძეს,
ვისი გულისხმიერი შეწევნითაც დაიბეჭდა ეს წიგნი.

გამომცემლობა აზრი

თბილისი, მერაბ კოსტავას 14, | სართული

ტელ.: 99 01 06 ფაქსი: 98 97 87

ელ. ფოსტა: mcrc@ip.osgf.ge

ყველა უფლება დაცულია.

ამ გამოცემის არც ერთი ნაწილი არანაირი ფორმითა და საშუალებით,
იქნება ეს ელექტრონული თუ მექანიკური,
მათ შორის ფოტოპირის გადაღება და
მაგნიტურ მოწყობილობაზე ჩაწერა, არ შეიძლება გამოყენებულ ან
გადაცემულ იქნეს საავტორო უფლების მფლობელის
წერილობითი ნებართვის გარეშე

პირველი გამოცემა

Copyright © დავით ქართველიშვილი 2001

Copyright © გამომცემლობა აზრი 2001

ISBN 99928 70 44 3

სარჩევი

პირველი წიგნი

5

კოწა-ხურო, ჩიტო-გერიტო

7

როგორღაც ასე მოხდა

9

ძილისპირული ბრაზობა სხარტი

16

მგზავრული, ელეგია

18

მგონი, ნეკროლოგი

20

პოპური

23

ათთავიანი მოთხრობა

32

გვრიტები ანუ ფურცელი
ქართული ნილილიზმის ჰისტორიიდან
40

სიმღერა მევლუღზე – ახალი
43

თხრა და გადამწერლობა
49

დარჩენილნი
55

პირველი წიგნი

ნებისმიერი წიგნი, დღიდან ამ წიგნის გამოცემისა, მკითხველის საკუთრებაა, მაგრამ პირველი წიგნი გამონაკლისია — იგი მხოლოდ და მხოლოდ ავტორს ეკუთვნის. გაიფიქროს კიდევ რამდენიმე წელიწადი და ამ პატარა წიგნის ავტორს მერამდენედ დაერქმევა ახალი წიგნის ავტორი, მერამდენედ გამოსცემს დავით ქართველიშვილი ახალ კრებულს, მაგრამ მისთვის ყველაზე ძვირფასი მაინც მისი პატარა კრებული იქნება, რადგან იგი დავით ქართველიშვილის პირველი წიგნია...

დავით ქართველიშვილი ახალგაზრდა პროზაიკოსია, მაგრამ ჩვენი საზოგადოების იმ ნაწილმა, ვისაც ლიტერატურა ძლიერ უყვარს, მისი სახელი უკვე იცის. უფრო მონდომებულ მკითხველს წაკითხულიც აქვს მისი რამდენიმე მოთხრობა ლიტერატურულ პრესაში და ლიტერატურული დებიუტისათვის იგი „წინანდლის“ პრემიის ლაურეატიც გახდა. თუმცა პრემიები და ჯილდოები მას ნაკლებად აინტერესებს, რადგან დავით ქართველიშვილი ნამდვილი მწერლური ცხოვრებით ცხოვრობს და

ჩვენ შორის სამწუხაროდ ცოტანი არიან ისინი, ვინც ისევე
კარგად იცნობს ქართულ და მსოფლიო ლიტერატურას, რო-
გორც დავით ქართველიშვილი. ალბათ ეს ცოდნა და განათლე-
ბა, ნიჟთან ერთად, განაპირობებს კიდევ მისი პროზისადმი ინ-
ტერესს, რომელიც სამართლიანად გაჩნდა ჩვენს ლიტერატუ-
რულ გარემოში და პირადად სწორედ იმ ადამიანთა, იმ მკით-
ხველთა რიცხვს ვეკუთვნი, ვისაც სჯერა დავით ქართველიშვი-
ლის მომავლისა და წარმატებისა.

და რაც მთავარია — უხარია...

ლათო ბურაშვილი

კოწა-ხურო, ჩიტო-გვრიტო

1976 წელს დავიბადე მე, დავით ქართველიშვილი. ნ ივ-
ლისს (ზაფხულის თვეა ვარვარა) ჩავტოვე დარბაისელი
ნათესაობა ჩემი (პარტიულნიც, უპარტიონიც) თბილისში
(ქალაქია). ბებიაჩემი: დაგვწვა, ბები, მზემ, გამოგვალაყა,
ჩემო სიცოცხლევ, ცელქო შენა, მზესავით ნათელო და
უბიწოვ ჩემო, მთვარევ ჩემო.

შამპანური უსვამთ — თუმნიანი — ცივი. გაგრილე-
ბულთ უტამფანდურიათ. ამ ოჯახის მომავალი ბურჯი და
დედაბოძია ეს ბლარტიო. გაქაჩულა ბებიაჩემი, შენ სიგ-
რძე (პიპერბოლაა, რა თქმა უნდა, გულითადი) აბია ჩემს
დათოსო. დედაბოძები შენიანებში მოიკითხე, ატოციას
გლახავ შენ. დამღერა გულმოოხებულმა ჩემს ხორთუმს
მერე: კოწა-ხურო, ჩიტო-გვრიტო, შენი სკოლის დამთავ-
რებას მომასწროს ქრისტე-ღმერთმა, შენი ინსტიტუტის
დამთავრებას.

ეჰ, ღმერთო ცუდო! ბუტე-ბუტე.

მე უბრალო ვარ. არც კლასში ჩავრჩენილვარ და არც კურსზე დაუტოვებია ვინმეს.

იურისტი ვარ დიპლომირებული. ამ კაცს სამართალ-მცოდნის კვალიფიკაცია უნდა მიენიჭოსო, — რექტორმა სთქვა. დამეხმარა ღვთიური.

რა თქმა უნდაო, — კომისიის თავჯდომარის მოადგილემ. ხია ბეჭედი დიპლომში ჩაბრილიანტებული მარჯვენით თვისით.

მერე მომიტრიალდა თვალეზრასაკოცნი: წარმატებებს გისურვებ ცხოვრების გზაზეო, — მითხრა.

თავი დავუკარი.

მერსი ავგუსტა and აუფვიდერზეინ.

ხაზარდაა! გზაა!

როგორღაც ასე მოხდა

20 აგვისტო

მამ დროშები უნდა დაუშვათ ჩვენი?! არა, არა, ნიკაგდა! მე, სირაჯ ოტიას, ყველა მიცნობს! მოვალეა ჩემი იმერი და ამერი. ყველა მოიქნევს ჩემთვის მუშტს ჯიგრიტ. იგრეთ ხოშიან ბიჭებს მოვიყვან, როგორიცრო ე იმ ჩვენი იმპერატორის ჯარშიც არც მოჰლანდებიან! შიშით ქვეშ გაუშვებენ, ჰა, ჰა, ჰა, შობელძაღვლები.

ოლონდ ჯერა, აი ამ ჩვენი დალოცვილი ტფილის-ქალაქის თავს მიუგზავნოთ კაცნი, ჰამქართა თვალისჩინნი, პირდაპირ მუშტი-კრივზე გადასვლა, ძმებო, როგორღაც ბუნგსა ჰგავს. გთავაზობთ აირჩინენ: სომეხი ვარდაგეს და ქართველი ჯონდია. ესენი ნასწავლი ხალხია, წერა-კითხვის მცოდნენი.

თანახმანი ვართ, ძმებო?

თქვენ გენაცვალოთ სირაჯი ოტია!

„ვარდაგეს — 42 წლის. მეწალე. ცოლი ჰყავს და ორი შვილი, ცოლთან ორივე. ჯონდია — 32 წლის. ყასაბი. საცოლე ჰყავს სოფლელი გოგო.“ — ჩაიკითხა ქალაქის თავმა დოსიე.

— ნიკოლაი ეგნატიჩ, — მიმართა მდივანს, ახალგაზრდა კაცს მომავლისმქონეს.

— დიახ, თქვენო ბრწყინვალება!

— განა სასაცილო არაა, რო უბირი ხალხი ესე აპროტესტებს მისი უგანთლესობის აბსოლუტურად კანონიერ და რაც მთავარია ცივილურ ბრძანებას, ჰა, ჰა და მართლაც რა საჭიროა ამქრები ჩვენს დიდებულ იმპერიაში?!

— რა თქმა უნდა სასაცილოა, თქვენო ბრწყინვალე ბავ!

— მე მზად ვარ აუდიენციისათვის, — სთქვა და წამოდგა ქალაქის თავი. სარკესთან მივიდა, ჩამოივარცხნა წვერი, გადაისვა თითები საბეჭურებზედ. სიქა ერტყა ზედ გენერლის.

ე, ესეთი ფუფუნება არ ენახათ აქამდე. მომავლისმქონე, ამჟამად მდივან ნიკოლაის წმინდა წიგნებში ამოკითხული ჰქონდა, რომ მთავარნი მოოქროვილ დარბაზებში მსხდომიარობდნენ, მაგრამ წაკითხული რა ბედენაა! გააოცა იგიც ნახულმა პირველად.

ეხლა სწორედ ის ეტიკობდა თვალებით, ხელებით, სიტყვებით კი აფრთხილებდა მოსულთ (ო, ენა-პირი):

— მის ბრწყინვალეებას ბევრი დრო არ აქვს. სახლში ელიან ყოვლადსათნო მეუღლე და უმანკო შვილები. მზადებაა, ფაცურია იქ დიდი. ერთ კვირაში მისი უბრწყინვალესობა ათ წლისთავს აღნიშნავს, ახარე და აბედნიერე კიდევ დიდხანს თვისის ქორწილისას, ბატონებო!

უკანასკნელ სიტყვაზე ენა მოეჩლიფა მდივანს.

ორმოცდათვრამეტეში დაქორწინებულა ჩემსავით, — გაიფიქრა ვარდაგესმა. ეამაყა დამთხვევა ეს. გაიბადრა.

პიოტრ, შენ მაინც რა გემართება. დიდი ხარ უკვე. პიოტრ, ნუ ჯიუტობ. წყეული გუვერნანტი. ფუჰ, ეს გერმანელები თავს ასალებენ ვითომც ტრადიციული პუნქტუალობით. შემოუშვებ სახლში და... ანდრე, ანდრე, სტინ-

ნი ო, ბოჟე მოი, რა დავაშავე. შვილების მომგონს ამო-
უწყდეს სახსენებელი, კაკ მ უსტალა. აღარც სარკესთან
პრანჭვა, აღარც სეირნობანი ხეივანში. აღარც საუბრები
გამო: პოეზიის, სიყვარულის; ტატალნაია პროზა ირგვლივ
ჩემდა.

თავისიანებთან ერთ საათში მიბრუნდნენ. ჩინჩიფურა კო-
ლამ შენიშნა პირველმა იგინი.

— მოდიან, მოდიან, — აყვირდა.

სირაჯი ოტია მიეგება ელჩით.

— რაო, რა სთქვა?

— ბრძანება საბოლოოაო, — ხელი ჩაიქნია ჯონდიამ.

— ვაჰ! მე მაგათი დედები ვატირე, — ბარძაყებზე და-
ირტყა სირაჯმა ხელები.

— ძმებო! დაიშალენით, დასხედით სახლებში. კრინტი
არ დასძრათ უკმაყოფილო. მაგის დროც მოვა. ანდერძს
აუგებთ, „არა, ეგეთი ხმამალალი ლანძღვაც არ შეიძლე-
ბა!“ — წამით შეშინდა ოტია.

22 აგვისტო

დაიკავეს საცხოვრებელი ქალაქის თავის. ოტია სარდლო-
ბდა: დაიარეთ, შეამოწმეთ ოთახები.

გათოკილი სახლის მცველნი სამზარეულოში ეყარნენ.
საწყლები!

— ყოჩაღ ოტია, სიტყვის კაცო, — ჰყვიროდნენ მოამ-
ქრენი, — შენ მარიფათს ვენაცვალე! როგორ დააგრიალა
ესრეთი ამბავი სუ ორ დღეში, რა ბიჭები დაგვიყენა
გვერდში ჩვენ ჰალალ ხალხს!

ქალაქის თავი ჯალაბით ლბილ სოფაზედ დასხეს.
აქეთ-იქილამ მკლავძლიერი ბიჭები დადგნენ.

— გააუქმე ე ოხერი პრიკაზი და წავალთ ჩვენ.

— გთხოვთ მიჰყვეთ ეტიკეტს. მე ვარ ქალაქის თავი, მისი უბრწყინვალესობა, საიმპერიო კავალერიის გენერალი, გრაფი გრეგორ ანდრეევიჩი...

ალარ აცალა ოტიამ. სწვდა სიტყვით:

— ვიცი, ვიცი, ვინცა ჰხართ. ვისი შაქმნილი — ეგეც, არ შემშლია ადრესი.

— მისი უდიდებულესობის ბრძანების გაუქმების უფლება მე არ მაქვს, — ხელისგულეებზედ დასცხეს აქეთიქით მდგომებმა მუშტები, — შემიძლია შუამდგომლობა.

— აგაშენა ღმერთმა, მაგრამ კაცი ესე იმპერატორი შორიელი როა?

— წერილს მივწერ. ერთი პირობით.

— სთქვი.

— მეუღლე ჩემი პანია ბარბარა და ბავშვები გაუშვით.

— მაგას მერე ვიზამთ. პასუხს რო მივიღებთ კეთილს. ეხლა კი შემოგველოს ოტია, ცალკე ოთახს დაუთმობ, რო არ შესწუხდნენ. გთხოვთ, ქალბატონო, მომყევით, ბალღებო!

ქანდარმთა მეთაური კავკასში, გენერალი ესეც, კარპოვი სავარძელში იჯდა. ეჰ, გრიშა, გრიშულია, — ლილინებდა — ბავშვობიდან უბედური ხარ! ეჰ, გრიშა, გრიშულია, — ტაში შემოჰკრა, — მე გშველოდი ყოველდროს. აჰ, გრიშა, გრიშულია, — თავი გადააქნია, — ძნელია ყოფნა ბარბაროსებში. ოიჰ, გრიშა, გრიშულია, — წამოდგა გენერალი, — შენი მეუღლე პანია ბარბარაააა, გრიშა, გრიშულია, — ჩაიღიმა კარპოვმა, — მე გავანთავისუფლებ ბარბარას და ვთხოვ ერთ ამბორს. ოოო გრიშა, გრიშულია, — შარვალი გაისწორა, — შენც შეგხებია ხორბლისფერი მისი ხელები. ჰეი, გრიშა, გრიშულია, — საფეთქელთან მიიტანა მარჯვენა მარჯვედ, — ჯარი მზადაა!

ეზოშია ჩამწკრივული.

— აი ოთახი თქვენი მოწონებული, ქალბატონო. — ცდილობდა, ნამეტანი ცდილობდა ზრდილი ყოფილიყო არისტოკრატიებივით. ნიჭი ჰქონდა, იცოცხლე; ხელი გაიშვირა სუბუქად მარჯვნივ. ბიჭები იდგნენ იქ. ესენი დაიცავენ თქვენს ბლარტებს, — ვერა, ვერ გაიხსენა ის უცხოური სიტყვა. — პანია-ქალბატონო! აბა, მე წავედი.

— მუსიე ოტია...

პანია ბარაბარას ხმა ჰქონდა — ჯადო! აბა, ოტია ხო იცი, ერთი უბრალო კაცი იყო ტფილის-ქალაქელი. რას არ დაემორჩილებოდა!

— გისმენთ, ქალბატონო.

— სიტყვა მაქვს თქვენთან საჩუმათო.

— ტალანში გავიდეთ, — აპლელდა ოტია, ტანქვე შექხურდა, გაუვარვარდა. (რა უზრდელი ხარ! და როგორი მიხვედრილი. ჰო, ეგა).

— თანახმა ვარ.

ქნეს.

— მუსიე ოტია, ჩემო გადამრჩენელო, მხსნელო ჩემო! მუხლებს გიკოცნით, ხელებზე გეამბორებით, — წაიწია სირაჯისკენ პანია.

— ჰა, ჰა, ქალბატონო, რასა შობით, — წახდა ოტია, ათახთახდა.

— ჩემო ღმერთო, მე ვარ პოლონელი კრაკოვიდან. იქ დარჩა ჩემი სიყვარული, ჩემი ანჟი. გამიშვით, პან ოტია, გამიშვით ანჟისთან, სამშობლოში. ფული მე ვიცი სადაც დევს, გავიყოთ როვნა პა პალამ.

ჯერ რა ჭკვა ჰქონდა უბედურს, ისიც დაჰკარგა და აკი არ დასცდა სისულელე კითხვითი:

— შვილები?

— შვილებს ანჟიც გააკეთებს, რა, ძნელია?! შობაა რთული. ღმერთმა დაგვწყევლა ჩვენ, ქალები, მაგრამ მე

მზად ვარ სირთულეებისათვის. პან ოტია, გამიშვით — აც-
რემლდა ქალი.

— ნუ, ქალბატონო, ნუ. ჯანი გავარდეს, თანახმა ვარ!

— გმადლობთ, — ჩარევერანსდა პანია.

პოი, მოულოდნელობავ: სროლა ატყდა. დუჰ, დუჰ.
ქანდარმები სროლულობდნენ.

გითხარ, ჯონდიავ, ჩათლახიშვილი ვიყო, გითხარ: დავიმ-
სოთ ჯიბეები ოქროთი და გავშპეთ აქედამ-თქო. გადავი-
დოდით თურქეთში — ჩილიმი, ტურფები... გითხარ, ჩათ-
ლახიშვილი ვიყო, გითხარ, რისთვის მტკიცე უარი, უბე-
დურო შენა... გითხარ, ჩათლახიშვილი ვიყო, გითხარ:
მოვა-მეთქი ქანდარმერია.

გამართლდა სიტყვა ჩემი: მოვიდნენ, ისერიან. ჯონდია
ჯიუტო, პატოსანო ჯონდიავ, საცოლის ერთგულო. რაღა
შენ მოგხვდა ე გოთვერანი ტყვია. საცოლე შენი უბედუ-
რი, რა გოგოა! ეგ რო შეჰკვივლებს: მაწონიი, რძეე... იტ-
რუნება ყველა. ეჰ, ჯონდიავ, ჯიგარი მეწვის მე — კოლას,
გულ-ღვიძლიც... მეშინია!

ღმერთი ჰფარავდეს იმპერატორის ერთგულთ!

თქვენო ბრწყინვალეზავ, კავკასიის ქანდარმერიის
უფროსო!

ამა წლის 22 აგვისტოს მოამქრეთა ბრბომ დაიკავა
უკანონოდ, შეჭრით ტფილის-ქალაქის თავის საცხოვრე-
ბელი. ამით საფრთხე შეექმნა სტაბილურობას და სიმ-
შვიდეს იმპერიაში.

აჯანყებულთ მეთაურობდა სირაჯი ტფილისელი ოტია
წკრიალაშვილი. ამჟამად იგი დაკავებულია.

თქვენის გენიალური ტაქტიკის წყალობით ჩვენგნით
მსხვერპლი არაა.

საუკეთესო მსროლელებს წარვადგენთ ჯილდოებზე
თქვენის ხელმოწერით. ცნობილია თქვენი უშურველობა.

მოჯანყეთაგან ზოგიერთი განთავისუფლებულია,
რადგან თანამშრომლობდნენ იგინი ჩვენთან. ახსოვს
თქვენს ბრწყინვალებას, რა თქმა უნდა, ვარდაგეს — მა-
თი მეთაური!

დალუპულთა დამარხვა ჩვენ მოგვიწევს. რა თქმა უნ-
და, სახელმწიფო ხარჯით.

თავად ქალაქის თავი ოჯახითურთ უვნებელია. ითხო-
ვენ თქვენთან შეხვედრას. ჯერჯერობით ესაა, თქვენო
ბრწყინვალება!

დიდება იმპერატორს!

მოპატაკე: პოლკოვნიკი გ. ზანდუკელი.

27 აგვისტო

ბედნიერი დასასრული, აჰა!

სუფრა იყო უხვი, ბარაქიანი. ათი წლისთავი ოჯახუ-
რი ცხოვრებისა — თარიღია!

მოგილოცავთ! — ზეაწია ბოკალი ჟანდარმერიის უფ-
როსმა, — სამაგალითო ოჯახია თქვენი, დიდებული. გაგი-
მარჯოთ!

გ ა უ მ ა რ ჯ ო ო ს !

ძილისპირული ბრაზობა სხარტი

ე ჩემი მაზლი, კაცს მაინც ჰგავდეს, ეგ ქინძი, ოხრახუში ევა. როგორ იბრიქება. გეყურება ადამიანო, შენი ძმა არკი გკადრულობს, გძინავს, არა?! ძილქუში დაგაწვა, ჰო, ჰო, ისე დაგაძინოს ღმერთმა და სამას სამოცდასამმა წმინდა გიორგიმ, რო ველარ გაიღვიძო, შე ბრიყვო, შენა. ი გონჯი, შენი ძმა, როგორ უნდა გჯობდეს ყველაფერში. ერთი ცოლი შეგხვდა მაგაზე უკეთესი, შე საოხრემოსაკრელო, და იმასაც ვერ უვლი. დამაბერე ქალი მუშაობით. გძინავს, არა? იგრეთი ჩაგთხლიშო მაგ ფუტურო თავში, რო...

არა, საქმეში ხარ ადამიანო. ვეუბნები, მივყიდ-მოვყიდოთ ე სახლ-კარი, ჩავიდეთ ქალაქში. უარზეა. მოგივდეს გამჩენი! სუ იმისი გუნებისა ხარ: ჯიუტი და ვირი.

რო მოეთრევი გამობრუქული და მპირდები კაი ცხოვრებას, რითი? თოხის ქნევით ვინ გამდიდრებულა. ა ჩემი მაზლი — დაუფსე ღმერთო თვალები, როგორ ბაქიაობს — ქალაქში ჩავიდა, გზაზე დადგა. იქნევს ე იმ ზებრა ჯოხს, ფშტვენს და მოდის ფული წყალივით.

კიდევ რო წუწუნებს და კვნესის — ააკვნესე ღმერთო მართლა — ზამთარში მიჭირს მუშაობა, ყინვაა და ქარიო. დედიშენის სილაღემ! უთოვლო და უქარო ზამთარი მარტო აფრიკაშია. თუმცა სადა გაქვს შენ მაგოდენა განათლება. წიგნი თუ იცი, რაა საერთოდ. მე ვიცი, ქმარი არ მივარგა, უფხოა, თორემ გავიდოდით ხალხში.

აი ნოდარი!

ხო უნდა შესცდე ადამიანი, ძღნერიც ხო უნდა სჭამო. რისთვის არ გავყევ ნოდარსა. ვუყვარდი გულით. სადი იყო ჭკუა.

ებლა კაცია ნოდარა, დიდი კაცი. მნახა. სოფიოო, — დამიძახა. მაშინით იყო, ხელი დამიქნია. აქაოდა, არ გინდოდა ყველი და რძეო, თუ როგორცაა. ვერ ვიმახსოვრებ ლექსებს.

შევცდი: საწყალ დედაჩემს ვუთხარი, მაგ ნოდარს მე არ გავყვები. დაბროწილ ხინკალს უგავს ცხვირი, ნამეტანნი უშნოა-მეთქი.

აი ფილთაქვა უნდა მიქაქუნოს კაცმა თავში. რა მინდოდა ამ მძორთან, გძინავს, არა?! გაიღვიძე, გაიღვიძე, შე საქონელო...

— რას მაჯანჯლარებ, ქალო, ალაოთა ხარ თუ სიზმარი ნახე ცუდი?

მგზავრული, ელევია

მარიკა.

გოგნი-გოგო, ანცი ვინმე, ტუჩებშაქარა, მზერაოლრაში სკამზე ზის. მკაცრად, ფეხები — ტყუბ. მზესუმშირას აკნატუნებს, ჩენჩოებს მიწაზე ყრის. მტრედები მოლიან. კენკავენ ჩენჩოებს. მარცვლებს ეძებენ, რა თქმა უნდა, მშიერი მტრედები, მსუნაგი მტრედები. გოგონა ილიმის. ირიბად ეპობა ბაგე. ფეხს არტყამს მიწაზე მსუბუქად. აფრთხობს მტრედებს. ფრთხებიან მშივრებიც და მსუნაგებიც, მიფრინავენ. მორიგ მარცვალს ფცქვნის. გული — პირში, ჩენჩო — ძირს, მიწაზე. თითებს იფერთხავს. ჰაერონად ათამაშებს.

მარიკა.

თვალებს ხუჭავს. I'm your man, შენი მამრი ვარო რა, — ჩასჩურჩულებს ვილაც. ცნობს ხმას, ვერ იჯერებს. კითხულობს: სად ვარ? L. A. თქვენ, მისტერ რიუ... Yes.

ჭყიტავს თვალებს.

მტრედები მობრუნებულან.

უყრის მზესუმშირას. კენკავენ გულეზაფართხალეზულნი სწრაფად, ჩქაროსნულად ირჯებიან მშიშრები.

მარიკა.

ფიქრობს: იქ, ლოს-ანჯელესშიც იქნებიან მტრედები, რა თქმა უნდა. იმათაც ეყვარებათ მზესუმშირა, პოპკორნი უფრო, აბა რა, იქ სხვა ჰავაა, სხვა სამზარეულო.

წამოდგა. გაიარ. სტოპ. საათს დახედა: სამის ნახევარი. დროა.

მარცა.

გამოვიდა სკვერიდან.

საელჩო მარჯვნივაა — იქით წავა.

ხელისგულებს დასჩერებია.

ქირომანტები, მწვალებლები, მასონები, ქალო, მომძლავრდა საქართველოში ერესი.

ტაშს შემოჰკრავს, მოჭორავე მარაქას გასრესს.

მარცა.

მალაზიასთან ჩერდება. დგება — PHILIPS.

გამოუფენიათ ტელევიზორები — ზომით, ფორმით სხვადასხვა — ვიტრინაში.

არ აინტერესებს: არც სპორტი, არც პოლიტიკა. არც ფეთხუმთა დიდაქტიკა. სამშობლოსათვის სწორდი. სტრაბონს უხსენებია იგი და ა. შ. და ა. შ.

დაელალა თვალეზი, სუსტი აქვს. ჩაჰხუჭა. Coffee? — თავს უქნევს. მასპინძელი ათითებს კაფეზე, მოპირდაპირე მხარეს. გზაზე გადადიან.

— ვაიმე, შვილო, ფრთხილად.

ავტოკატასტროფაში მოყოლილ გოგონას ესაჭიროება სისხლი: | ჯგ., რეზუსი — დადებითი.

განვაგრძობთ ჩვენს მიქსს. ლეგენდარული DOORS — L. A. Women.

მგონი, ნეკროლოგი

აუპ, როგორ დიდად დაფასდა სილოვანი. შვილიც ეგეთი უნდა — თევზი იყო მარტო ექვსნაირი სუფრაზე. დაფასდა, მაგრად დაფასდა ეგ ყვიციანი. ორმოცდაერთში ომი რო დაიწყო, მეორე მსოფლიო — ჩვენთვის სამამულო — პირველივით ოთხწლიანი, იქ გავიცანი, გული ჰქონდა როგორი სუსტი და ფრთხილა, იცი? სროლის ეშინოდა. მაგრამ წესები აქვს ომს, თავისი კანონები. გადახვალ და გასაღდები, მამ! გაკაჟდა თანდათან. ისროდა, ესროდნენ. სესტრიცა გვყავდა რუსის გოგო. შხვართი, ჯეირანი ოლგა. ჩვენებურად მოწყალების დაი და აკი გვიწყალობა რიგრიგობით ტრიპერი.

გაგვაგოსპიტალეს.

ჰოსპიტალში გავიცანით ერთმანეთი კარგად. ქართველი ეგ იყო მარტო, თორე თბილისში ეგეთ ხიბოსთან რა დამლაპარაკებდა. სხვანაირად ცნობილი ვიყავი მე ქალაქში.

ცხარე — არა, მჟავე — არა, სასმელი — არა, განკურნება თუ გინდა, უნდა დაემორჩილო კიდეც რეჟიმს. დაიცვა. აბა, რძე და ხაჭოს პილმენები სად იყო მაშინ, ჭირდა ცხოვრება.

ვმარხულობდით. სამოთხეში თუ მოხვდება, ეგ იმ მარხვის წყალობით, თორემ კაი რა აქ სხვა გაკეთებული. ქეიფი მაგან არ იცოდა, ძმაკაცობა, ფული კი ჰქონდა. მი-

წამი ფლავდა ან ცოლს ატენიდა იმ ფართო ტრაკში. რა ვიცი, მაგის დაპატიჟებული კაცი მე არ მინახავს სახლში ან რესტორანში და...

გამოვკანმრთელდით. შევბრუნდით ომში. მივდიოდით და მივდიოდით წინ. გადავედით უცხო ქვეყნებში ზა როდინუ! ზა სტალინა! დიდი, უდიდესი ადამიანი იყო იოსებ ბესარიონოვიჩი! ეხლა შენ ნუ გაბრუნდები რაღაც — ფულისათვის დაწერილი — წიგნებით. ერთადერთი ნაკლი ჰქონდა. ისიც — ადამიანური, საერთო: ადამიანები არ უყვარდა, ეგ იყო და ეგ.

ამერიკელებს შევხვდით ელბაზე. ხუხეს ჩვენებური სპირტი. ჩვენ — იმათი ვისკი. დავძმაკაცდით. ქალები ახლდნენ, მაგათ უქალებოდ არ შეუძლიათ, უყვართ გართობა.

ქალები, ოჰოჰო. ჩვენებური, იცი, გათხოვებამდის უკარებები არიან, ბლენძიები. გათხოვების მერე იცოცხლე, გიკარებენ წინიდან და უკნიდან. ამიტომაა, რო ჰკუიანი კაცები დამების სიახლოვეს ტრიალებენ სამუდამოდ.

ისენი — არა, კაცო, ფეხებზე ჰკიდიათ, აქეთ გაბავენ. გამიყვანდა მილენა, ბურჭებში ჩავსხდებოდით, ჩამომაცვამდა საჯაყზე რეზინს. შემიფუთავდა და მიდიი.

ხან შეკითხვებს მისვავდა. მაგას ვჰამდი. თავიდანვე ვისიამე — აგენტი იყო.

ერთი იქაური, ამერიკელი გოგო — სახელიც იმპორტული ჰქონდა — შენონ, შეუყვარდა ამ ტუტუც სილოვანს.

შენონმა: მე თქვენს ჩამორჩენილ ქვეყანაში ვერ ვიცხოვრებო, — თქვა.

გავგიჟდი: შენი პროვოკატორმა დედა რაკამ-მეთქი, — აუტეხე გინება.

სილოვანმა: რა ვქნა მიყვარს. მიყვები ამერიკაშიო.

— აუ, შე სამშობლოს და სტალინის მოლალატევ, —
ვეცი.

დამმორჩილდა.

ომის მერე ვაკის პარკში ვხვდებოდით ერთმანეთს. მო-
დიოდნენ ჩვენთან ხელოვანნი: არტისტები, მწერლები,
ეგენი ხო მუქთა ხალხია, ვაქეიფებდი.

92-ში ფული რო გაფუჭდა, იმ დღეს შევხვდით. ლა-
მის ტიროდა. მერე აღარ მინახავს პირადად.

შვილი, შვილი გამოადგა. კაცი დადგა, რევოლვერიან-
ნი ყაზილარები დაჰყვებიან მცველებად.

აუ, როგორ დიდად დაფასდა სილოვანი.

პოპური

წარსდგა ერმოლოვთან — მოხილვა — ვიზიტ.

ყოჩაღად, ოოო, გამეტებით სთხლიშა ქუსლს ქუსლი, —
ჰაი გიდი! აკი ურჩიეს მეგობრულად: დაერტყა ჩექმებზე
ღუზები, — ჩაისვარა ხმამა, ვეჟო.

შტაბსკაპიტანი მაჩაბელი გამოცხადდა.

— თავისუფლად.

დაიფრქვა. ეპითეტებით, მეტაფორებით შეამკო, მორ-
თო ერმოლოვი. ზაფხული იღვა — ბიბინებდა სიტყვა
(ხარფუხელი კოსტასიც: შუშა კიტრიი).

მამ, ცხელა.

აივანზედ გავიდნენ.

— დაბრძანდი, — სთხოვს, ითხოვს ერმოლოვი.

ჯდება თვითონ.

მაჩაბელიცა.

სავარძლებში სხედან, ჰხედავა?

ერმოლოვი: პეტერბურგში ვგზავნი გრიბოედოვს. მის-
სია.

მაჩაბელი: ქრისტიანული ალაგაა. უპირველესი.

ერმოლოვი: შვილივით მიყვარს სანდრი.

მაჩაბელი (დგება, იჯგიმება): ვემსახურები იმპერიას!

— შვილო, — გაინტიმურდა ერმოლოვი, — დააკვირდი
სანდროს. ადევნე თვალი. მომწერე რა, ვით.

— არის. მოგწერთ რა, ვით, — დებს პირობას შტაბსკა-
პიტანი. ჯამუში (ქართველი).

ნუთუ?

* * *

სამსახური მჭირდება. სამუშაო. ძან მჭირდება, ჯამათო
(ინტერაქტიური გამოკითხვა: მჭირდება — 96%. არ მჭირ-
დება — 4%). ამორჩეულიცა მაქვს ადგილი (სუფთა, ნა-
თელი), სკამი (ლბილი).

დედაჩემი: მანდ ძნელია.

გიორგი (ჩემი ძმა) ყუჩადაა.

მამა აღარაა, ფუ-ფუ. დაიკარგა ცაში.

დავრბივარ ბიჭი. აქეთ-იქით მიმოვდივარ. ვყია-
ლობ.

ნელი, შოთა — ნათესავი, მეგობარი — მეხმარებიან
ესენი. ანა ჩალიჩობს სხვა მიმართულებით (ჟურნალიზ-
მისთვის პარდონ). აბა, ჰე და აბა, ჰო, უშველეთ დათუ-
ნია ღრუნჩასა. დაგვისევდიანდა. მელანქოლია.

* * *

ჯერ არ. ჯერ არ. ჯერ არ. აღრეა. ცივა, — ამბობს
ილია.

აფერხებს არტურ ლაისტს — ჩაჩნეთში სურს ასვლა.
იქაურობის მონახულება უნდა, შეთვალეერება. ილიას
სთხოვა ესერამ საქმეში პარტნიორობა. მიიღო დასტური.
ოღონდ ჯერ არ. ჯერ არ. ჯერ არ. აღრეა. ცივა.

ფეხს ითრევს. ტკეპნის ერთ ადგილს — ჰბრაზობს ნე-
მეცი. ბრალს სდებს (მყვა რა ესეცა ზოლა, იმ ღროს მო-
ღური, ემილ).

ჩაჩნეთში მოხვედრის სურვილი არტურისა სიკაბუკო-
ბისდროინდელია, ძველთაგან მოსდევს. არქაიკა.

მოქმედების ადგილი — ბრესლაუს უნივერსიტეტის კოხტა სკვერი, შეყვარებულთა ნავთსაყუდელი (ნუ. ნუ მკოცნი ხელისმოწერამდე).

ჰყავს გოგო ამორჩეული არტურს. თვალავს. სდევს.

— მაშ, მამათქვენი, ნადეჟდა პეტროვნა, პოლკოვნიკია, ჩაჩნეთში მსახურობს. თქვენ აქ ხართ, ბრესლაუში. სწავლობთ. დედა?

— გარდაიცვალა ციებით. ბუნდოვნად მახსოვს, — მზე-რა ეძაბება გოგოს. ტვინით გამოიხმო დედის სახე, — ცისფერი თვალეები ჰქონდა, ფუმფულა ლოყები დედას.

— თქვენებრ, — ჩურჩულებს არტური. ხელები მუხლებზე უწყვია, — მიყვარხართ, ნადენკა.

— მე, მე ვიფიქრებ, ჰერ ლაისტს.

დიოდენ დლენი. გოგონა სდუმდა. ერთხელაც, შავდა-უკულმა ის დღე, მივიდა არტურთან. ქალაღი აჩვენა.

— მე რუსული არ ვიცი, ნადენკა, — წითლდება. თავს ჰხრის.

— წერილია მამაჩემისაგან, ჩაჩნეთში ჩასვლას მთხოვს, ავადაა. აუფიდერზეინ, ჰერ ლაისტ. — ხელი გაუწოდა.

სწვდა არტური ხელსა — პუ!

მონოლოგისგობს არტური, თავისთვის, გულში:

ჩაჩნეთშია აწცა კვლავ ნადენკა, ლაზარეთში აქიმაღ დგას.

ეს კი (ილიას უყურებს): ადრეა, ცივაო (ვიცნობღე კავკაზს მაინც). ზაფხულს ელის, სიცხეს. თიბათვის მზევ, მო ჩქარე...

უდიდესი ყურადღება სიზმრებისადმი; ვიმახსოვრებ. ვფურცლავ წიგნებს. იქ ახსნაა:

დანიელი მაიმედებს; ფროიდი — უზრდელი ვირიშვილი, განვედ ჩემგან; შვეიცარიელი იუნგი ნეიტრალურია.

— არ დაიკარგება შენნაირი ბიჭო, — მეუბნება მკითხავი ზეინაბი.

— ჰაი, ღმერთმა გისმინოსო, — თვალები უბრწყინავს დედაჩემს, აცეცებს ამ ბოლო დროს.

— ნერვები, შვილო.

სიზმრებს არა უშავს, ა გუშლამინდელი: სავარძელში ვზივარ. ჰგუობს უშბა-მკერდი მიკროფონს. ოთხცალ ღირსების ორდენს. (კიდევ აიგანს)!

— ოთხჯერ ღირსეულო ბატონო დავით, თქვენი ჰობი? — მეკითხება ჟურნალისტი გოგო. მუხლები ულაპლაპებს.

— სიყვარული, გენაცვალე. მიყვარს, მაგალითად, პროზა, საქართველო მიყვარს, — მუხლი მაგარი აქვს. სოფლად გამოზარდეს.

მოდისა გამო აყრანტალებს.

— და ღმერთი?

— ღმერთი, რა თქმა უნდა, არსებობს, არის.

წლევანდელი სახელმწიფო პრემია ჩემია!

ღირექტორის კაბინეტიდან გამოვიდა. ჰერი, ჰერი სარედაქტოროსკენ.

შეალო კარი.

— ჩეჩნეთში მივდივარ, — გამალა სამივლინებო ფურცელი.

— ალლაჰ შენთან, — ამბობს რედაქტორი (დიდ პონორარს მოხვეს ვირისთავი).

შური, ჰო, შავ-თეთრი.

* * *

დაცვა უყენია სახლთან სააკაშვილს. ჯიხურში სხედან ოყლაყები. ისე მიყურებენ, აი ეჭვით. მემარცხენე — ცაცია-რადიკალი — ტერორისტი ვგონივარ ამათ ალბათ. სთხზავენ წერილებს გუნებაში უკვე:

დედიჯან, პატრონი ვიხსენი, აბა, ბინას მომცემენ, მგონია. ჩამოგიყვან, დედი, ქალაქში, ირანულ რჩხია ფლოსტებს გიყიდი. ბოლმა დააღრჩობს ჩვენს განაყარ ბიძაშვილებს, დედი-ვადილაო.

ჟვანიასაც. — ც-ოო? წყეული გრამატიკა, დიღო სპიკერო. ტყვიის ღირსი ვარ. არა. თავში არა. არა. ცოდო ვარ, ცოდო — იცავენ.

რკინის ქალამნებს ჩავიცვამ და შევარდნაძესთან ავალ. მალლა ცხოვრობს კრწანისში (შენთან, ეღუარდ, მოსვლა და მუხლის მოდრეკა მომინდა).

უარს მეტყვის?

შიმშილობას გამოვაცხადებ, ჰო, შიმშილობას.

არ გაუწყრება ღმერთი. დემოკრატია, ტოლერანტი მიმიღებს:

— Чашь мой выбор.

ოტროველასავით პირდაპირ ვეტყვი: მოდი რა, რასა ჰკარგავ, დამნიშნე დეპარტამენტის უფროსად, ჰა! ბატონო პრეზიდენტო, გქონდეთ იმედი. ჰედ ენდ შოლდერს (თავი და მხრები).

მაბია!

მისი უდიდებულესობა გენერალ ერმოლოვისადმი:

მაჩაბელი გეხმიანებათ, შტაბს კაპიტანი (ქართველი).
ღმერთმან დასწყევლოს იმპერიის ჩვენის მტრები. ჩაჩნებ-
ზე მოგახსენებთ. ხეპრე მთიელნი. შამილი ძალღის მჩორი.

დაგვესხნენ. დავყარეთ იარაღი. თავები შევინარჩუ-
ნეთ. გვემუქებოდნენ უშეჯულონი, გვაგინებდნენ. დაგ-
ვსხეს ქობში, აწმორებულ საფუნეში გენერალო, მოგვი-
კეტეს კარი. ცხრაკლიტული.

დაბლა — ხევი, ზევით ნახე, რა ცაა. ესაა რაცაა, რო
სჩანდა ქვეყნისა იქიდამ (მწირი პეიზაჟია, — ასკენის ერ-
მოლოვი. წერილს უბრუნდება. ჰკითხულობს).

მოყაყანე — ფორტისიმო — ტომია ესე ჩაჩნები. მოძ-
რავი, ჰყარან.

ცხვრები ჰყავთ. უამრავი ცხვარი. ფარები. მოპეტელე
საკლავი, თქვენო უდიდებულესობავ!

(ეთნოგრაფი, — დუდლუნებს ერმოლოვი).

ცხვრით ვიკვებებოდით. მიჰქონდა ალუს, ზედამხედ-
ველსა ნატიყნი ხორცი, პური კიდევ და წყალი ტოლჩე-
ბით. უგემური, დუბელა წყალი, მღვრიე.

ჭამა-სმამ ესემ დამააჟადა — ფალარათი — მომიშალა
კუჭი.

(სუბიექტური აღმური! — ტუნს ითრევს ერმოლოვი
ქვედას. ჰლეჭს).

სანდრი-ყოჩალი მაგრად სდგას. სწყევლის ბარბაროსთა.

(ძალიან კარგი, ძალიან კარგი! — ზეიმობს ერმოლო-
ვი. ქომაგი იყო მათი. გახდა მაწყევარი, შეიქნა. სიტყვა
სიტყვაა. პირობა — პირობა. სამი ცხენი და ოცი თოფი
ჩემზეა, შამილ!.. მომდევნო წინადადებები ცალი თვა-
ლით ჩაიკითხა. ყასიდად. უკანასკნელ აბზაცს მიადგა —
დასერიოზულდა. დადინჯდა — აითვისა, გაიანჯრა).

გამოვალწიეთ. დაჰკრილი გრიბოედოვი ლაზარეთში გა-
დავიყვანეთ, იქვე ეზოში, მუხის ქვეშ გავშალეთ სუფრა.
თამაღობა ჩვენს მხსნელს, კაზაკთა ატამანს დავეუთმე.

ივარგა.

ადიდა იმპერატორი.

ღმერთმაც!

* * *

ღედა წყნეთში ავიდა ნელისთან — მოაგარაკე. ჰაერს ჩაყ-
ლაპავს. დაისვენებს.

გიორგი — ჩემი ძმა — absent. დადის ქუჩა-ქუჩა.

ანას ვიბარებ. მოდის.

ჰო, ახლა შენც ზევით და მეც ზევით. ვიხარჯებით.

ვწევართ. ვაბოლებთ ქანცგაცლილნი.

ანა: სამსახურის ვარიანტია.

ყურებს ვცქვეტ (ღმერთო, ოღონდ ჩარჩობა არა!).

მიხსნის. განმიმარტავს.

ვღგები, გავდივარ. არის ამ სახლში სხვა ოთახებიც.
ციცქნები. ფართოები.

* * *

მუხასთან შეჩერდნენ. არტურმა სთხოვა: ილია ბატონო,
აქ მომიცადეთ.

ილია დასთანხმდა უსიტყვოდ. გაიფიქრა: „ბაღლი“.

დაიძრა არტური, ამოძრავდა. გეზი — ლაზარეთისაკენ.

მეკარე მიესალმა. თავი მოჰხარა, წელში მოიკაკვა. გზა
მისცა.

ძვირფასად ეცვა არტურს. საგანგებოდ.

დარჩა ილია მუხასთან. გრილოში. ეზო დაალივერა.

ცარიელი იყო. არსად კაცი. მხოლოდ ჭიშკართან იწვა ნა-
გაზი. მრისხანე აუა.

კავკასიაში ყოველივე ჯიშინანია: კაცი, ძალი, ფრინველი, ბანოვანი. ბანოვანნიც, მაგრამ მე სიფრიფანა ჩრდილოელი ქალები მომწონს უფროს. გაახსენდა: მადმუაზელ ჩაიკოვსკაია. ხანმოკლე აშიკობა, რომანი პლატონური მასთან. აკლდა გამბედაობა მაშინ ილიას, ჭაბუკი იყო.

მისი ძმა ცნობილი კომპოზიტორია ახლა. ევროპა ასრულებს მისსა თხზულებებს.

შორს წავიდა მამათმავალი, მსოფლიო აალაპარაკა.

მიეყრდნო მუხას ილია. გაუსვა ზურგი.

— მთებში ვართ ჩაკეტილნი. იყვირე გინაც, ამოა, — ჩაილაპარაკა.

* * *

ანა (ტელეფონში): ხვალ მიდი (მკარნახობს მისამართს)...
შეიბ ჰალსტუხი, დავით.

* * *

პატივცემულო ტელემაცურებლებო, განვაგრძობთ გადაცემათა ციკლს ჩეჩნეთში.

თქვენ კადრში ხედავთ ჰოსპიტალს. მეცხრამეტე საუკუნის დასაწყისში აუშენებია ის იმპერატორის ბრძანებით გერმანელ არქიტექტორს, გვარად ჰოფმანს.

დღეს აქ წითელი ჯვრის ოფისია. მოდის ხალხი მთხოვნელი.

ჩვენ გავესაუბრეთ რამდენიმე მათგანს, გთავაზობთ ჩანაწერს.

(ეკრანზე ჩნდება დელაკაცი ფუმფულა): ომი საშინელებაა, დაამთავრეთ!

(დელაკაცს ცქნაფა გოგო სცვლის): მე მსურს თამაში, გართობა.

(ვხედავთ ჟურნალისტს): ახლა კი ძვირფასო ტელემაცურებლებო მოუსმინეთ გაეროს წარმომადგენელს.

(კაცის სიფათი — ზანგია): მსოფლიო საზოგადოება ძალებს არ იშურებს იმისათვის, რომ აქ, ჩეჩნეთში (ოპერატორს გამოჰყავს კადრი — რესპოდენტი და ინტერვიუერი მუხის ქვეშ დგანან, მერე სხვა პეიზაჟებსაც აშანშხვალებს ჩეჩნეთისას, შარაგზა და გადაღმა) დამყარდეს მშვიდობა. მოვუწოდებთ დაპირისპირებულ მხარეებს დასხდნენ მოსალაპარაკებელ მაგიდასთან. Thank you!

(ბრდღვიანებდა წარწერა).

რეკლამა.

* * *

დამკვეთი: მამ, ასე, დავით ძმაო, საზღვარზე ჩეჩნები გადაგიყვანენ. წითელი ჯვრის კაცთან დაგაკონტაქტებენ, მისმენ?

მე: დიახ.

დამკვეთი: ის მოგცემს მედიკამენტებს. არ დაგიმაღაფ, ძმაო, ზოგიერთი ნარკოტიკია...

მე (დამფრთხალი): ქსივა მექნება?

დამკვეთი: გექნება. დაბრუნებისთანავე ათას დოლარს დაიჯიბებ. არაა ცუდი ფეხისქირა. რას იტყვი?

მე: არაა, რა თქმა უნდა.

ფინელი ტიმი მანქანას ტვირთავს.

მე მუხის ქვეშ ვდგავარ — მომე, მუხა. რკო. მერქანს ვჩხაპნი ჯიბის დანით.

კრიპტოგრაფია.

დასასრული.

ათთავიანი მოთხრობა

I. სარეკლამო

ყოჩი ქალაქელნი, განთქმულნი — ორთაჰალა უსმენს ამათ. ჰავლაბარიც. ჰსჯერავთ — თამაშევეზედ ამბობენ: სუფთა პარიჟანელიაო.

— აჰ, ნაღდი, — კვერსა ჰკრავენ ტურფანი, ადასტურებენ.

— მართლაც რო ჰგავს პარიზელს! — ვეხილები მე, დავითა, თანამემამულეთა.

ერთ მუჭად ვართ შეკრულნი. გიხაროდენ. სამშობლოვ (69 000 კვ.კმ.), ათასო ვრცელო მდელი და ველო.

თამამშევი კი ფრაკს ატარებს. სიარულიც დინჯი იცის, კოხტა და ფაქიზი. ჯერ ქუსლს სდგავს მიწაზედ, მერმე ტერფს.

მზერა მადლიანი აქვს.

ყოჩი ქალაქელნი: თავადური.

ტურფანი: დამპყრობიც.

მე, დავითა: ჰკუიანიც.

კვლავ ერთ მუჭად ვართ. ასეა. მტერო, გვიფრთხილდი! გაძვერ-გამოძვერი.

დაიკარგე!

II. პათეტიკური

გრუზინნი არიან ვოსტორგში:

- ოპერა გვექნება, ხალხნო, ჩვენი ოპერა!
- ბატონი თამამშევი გვიშენებს!

III. ინტიმური

გრაფი ვორონცოვი სარწეველაში ზის — ირწევა. თვალები დახუჭული აქვს. პაი, ახალგაზრდობავ, გაპარულო. ოდესა, ორთქლმავალი — ბანზე სდგას. ჭაბუკია. მხნე კაპიტანი. ორ-კესტრა გრიალებს. სცილდება ორთქლმავალი ნაპირს. ნელა ნელა. თანდათან. შედის ზღვაში ღრმად. ღრმად. წყალი კამკამაა. თიმთიმებს. შეამცივნა კაიუტაში ადის. ფიქრშია გართულია. შედის კაიუტაში. სარწეველაში ჯდება — ირწევა.

— თქვენო უდიდებულესობავ, ლაქიაა.

გრაფი თვალებს აახელს. ლაქიას უშტერებს

— თამამშევი გეახლათ. ადგილობრივი დიდვაჭარი.

— უხმე, — დუნედ აამოძრავებს მარჯვენას, ზარმაცად.

IV. სალონური

გრუზინნი არიან ვოსტორგში:

— ოპერა გვექნება, ხალხნო, ჩვენი ოპერა!

— ბატონი თამამშევი გვიშენებს!

ხარობს მ. ო. — მაიკო ორბელიანი. საქართველოსია ის ვარსკვლავი. მზე თამარ!

გადაჰედლილია მაიკოს სალონი. ძვრა ჭირს. ჰბჰობს ქართველობა. ქართველობა ვოსტორგშია.

მ. ო.: განთიადია. განთიადია.

მაიკოსებრ ბევრია აღტკინებული. დიდი მაგალითი. აი სერგი ყიფიანი.

— მეგობრებო! იქნებ ქართული დროშის აფრიალება მოხერხდეს რომელიმე წარმოდგენისას, — ჭიქას სწევს ყიფიანი მალლა, მალლა, — ღმერთი შეგვეწევა ბატონებო. ჩვენთან არს!

— ქალბატონებმა დაგიშავეთ რამე? რისთვის გვრყავთ, სერგი ბატონო, — მაიკო ამბობს.

— ბატონ სერგიას სჩვევია ეგ, — ესტატე ციციშვილი ამეტყველდა.

— რასაა, რო იგესლები იქედნასავით, ჩემო ესტატე. — თითს იქნევს ყიფიანი, — გონს მოდი, ყმაწვილო.

პირისპირდებიან.

მაიკო ვარდება მათ შუა.

— დაწყნარდით, ბატონებო!

— მე წყნარად ვარ, მზეთუნახავო. — თავს ხრის ციციშვილი.

— ერთია უბრალოდ: მაშფოთებს და ძარღვებს მიშლის თქვენი ოპტიმიზმი. იმედიანობა. ხალხო, ქალბატონებო და ბატონებო. თამამშევი სომეხია, თანაც ვაჭარი. აბა, იფიქრეთ, სომეხი ვაჭარი ქართველობისათვის იზრუნებს? თვითონ სომხურ დასსა არა სწყალობს თამამშევი. მაგისი გროშ-კაპიკი გაღებული არც ვის ახსოვს იქა. ეგ ტერიტორია-ალაგი, საცა ოპერის გაშენებას აპირებენ, იცით, მე მივსპყიდღე თამამშევს...

— ორ დოშად და ერთ საკაბეთ. ორ დოშად და ერთ საკაბედ, — ხარხარებს ყიფიანი.

სხვები იცინიან.

— ჰო, ეგრე ორ დოშად და ერთ საკაბეთ. ქარვასლის გაწყობა ჰსურდა მანდ თამამშევს.

სხვა ამბავია ჩვენს თავს. სხვა ამბავია.
ციციშვილი ჯდება. პაპიროსს აბოლებს.
სიჩუმე წამიერი, უჩამიჩუმობა.
შემდეგ — კვლავ ვოსტორგი:
— ოპერა გვექნება ხალხო. ჩვენი ოპერა.
— ბატონი თამამშევი გვიშენებს.

V. ემოციური

პ, ლელავს თამამშევი.

აი.

ორი დღის წინ დაეწყო ჩქარი გულისცემა, ფრიალი.
ორი დღის წინ აცნობეს: ბატონო თამამშევი, თქვენის სახ-
სრებით გადაწყდა ტფილისში ოპერის აშენებაო.

ჰკითხა: — თქვენ ვინა ხართ? ვინა ბრძანდებით? —
მაცნეს თამამშევი.

— იმპერატორის საიღუმლო კანცელარიის თანამშრო-
მელი, პორუჩიკი ანდრეი ვოლკოვი, — მისცა სალამი მაც-
ნემ და ჩაბრუნდა სავარძელში. ხოლო თამამშევს გული —
მუშტისოდენა — გაუდიდდა. გაებუშტა. „ე, ეს როგორი
სამართალია, არა, არა, ცავატანემ, მე პატიოსანი ვაჭარი
ვარ, რა უნდა ჩემთან ოხრანკას და ეგეთ მამაძაღლობას.
რა ესაქმება? ბებიათქვენისამ, ოპერას კი არა, ფეხსად-
გისს აგიშენებთ, თქვე დამპლებო! თქვე ჩათლახებო! მამ,
ღმერთი აღარაა? მამ, ღმერთი მოკტა? არა. არა. ცავატა-
ნემ, ვორონცოვთან მივალ. მივალ.

კაცნი ვართ — ხავსს ვეჭიდებით.

ასეა.

სარკესთან წარმოსთქვა ეს მონოლოგი თამამშევი.
მაცნე კაი ხნის გასტუმრებული ჰყავდა. ჰოდა, ჰყვიროდა.

ჰყვიროდა.

ჰყვიროდა.

ხავოდა.

ჩაჩუმდა.

ჰ, ლელავს თამამშევი.

უზარმაზარი ტალანი განვლეს: თამამშევმა, ლაქიამ.

თავი შეჰყო ოთახში, ტანი, ფეხები, შელასლასდა.

— ბატონო თამამშევ, ბონჟურ.

— გამარჯობათ, ჩვენო უდიდებულესობავ!

შეხტნენ.

VI. პატრიოტული

მაიკოს სალონი დაცარიელდა. გაიკრიფნენ სტუმრები.

სტუმარნი.

ციციშვილიღა დარჩა.

მ. ო. ფანჯარასთან სდგას. ესტატე ბორიალობს. დუღ-
ღუნებს.

— ჰპრაზობთ, ბატონო ესტატე, ხომ? — ტრიალდება მა-
იკო სახეგარსკვლავა.

— ქალბატონო მაიკო, ცუდი ამბავია ჩვენს თავს. ოპე-
რას ვინ აგვიშენებს მუქთად. უანგაროდ.

— ხდება, ყველაფერი ხდება, ბატონო ესტატე.

ციციშვილი ჯდება.

— ოპერა მოკლავს უნივერსიტეტის იდეას, — ახარხარ-
და ციციშვილი. ხარხარებს.

მაიკო შეშინებული: ცუდად ხართ, ბატონო ესტატე.

— არა. — წყნარდება ციციშვილი — არა. ჩემს თავზედ
მეცინება. საზოგადო მოღვაწისებრ ავლაპარაკდი. ფეხზე
მკიდია. უბრალო კაცი ვარ. ვჭამ. ვსვამ. ერთ მშვენიერს

დღეს გადავბრუნდები და ჰაი გიდი! ჩავბარდები პატრონს. ისე, რაში გვჭირია ქართველობას უნივერსიტეტი, საერთოდაც სწავლა. განათლება. ბრბოი ვართ.

ხოლო მაიკომ:

— გვჭირდება, ბატონო ესტატე, გვჭირდება. შუალამემდის ისაუბრეს.

VII. მიზეზნი

თამამშევი: ეგ სიმართლეა.

ვორონცოვი: აბა, როგორ. ქართველობას მისი უგანათლებულესობის კარზედ ხალხი ჰყავთ. უნივერსიტეტს ითხოვენ ქართულს, გაგვიხსენითო.

თამამშევი: ბებია მაგათამ! მაპატიეთ თქვენო უდიდებულესობავ! გამოდის, რო ჩემი შვილი უსწავლელი უნდა დარჩეს, ხოლო ესტატე ბრიყვის (ციციშვილზედ მოგახსენებთ) შვილმან პროფესორის ტიტული უნდა ატაროს. ბებია მაგათ!

ვორონცოვი: ზუსტად მასე იქნება, ჩემო გონიერო. იარსებებენ ქართველი განსწავლული პროფესორები და უსწავლელი სომხები.

თამამშევი: შვილები კარგია, თქვენო უბრწყინვალესობავ. მაგრამ ჩვენც ადამიანები ვართ. ცხოვრება გვინდა! ფინთად მიდის ბოლოხანებში ჩემი საქმეები. ქარვასლის აშენება იყო ჩემი ხსნა და საშველი. მომეცით, თქვენო უდიდებულესობავ, ნება ე, იმ ოპერაში სავაჭროს გაწყობისა.

ვორონცოვი: რა თქმა უნდა, ივაჭრეთ, ოლონდ კულტურულად.

თამამშევი: ეგრე იქნება, თქვენო უდიდებულესობავ.

VIII. ძილისპირული

წეანან.

ფეხს გაჰკრავს ცოლს.

— მღვიძავს, ბატონო პორუჩიკო.

— კუკოლკა, — დაითრია ცოლი, მიიზიდა, — ჩემო. ჩემო.

— შემეშვი, ანდრეი.

— გაგაცინო?!

— ოპერა რო შენდება, ხო იცი?!

— ვიცი.

— სამხატვრო ხელმძღვანელის მოადგილედ მნიშვნავენ იქ იცინეს. იკისკისეს.

IX. ხალხური

სამუშაო დღე ჩათავდა. ყველაფერი კარგად. წესისებრ. მუშები პურისჭამად დასხდნენ.

— ბიჭებო, იმის დედა ვატირე, მე თუ აქ ფულისათვის ვირჯებოდე. ბიჭებო, რო წარმოვიდგენ აშენებულ ოპერას, ფაშფაშა მომღერლებს გამიშვლებულის მხრებით, დიდის ძუძუებით, ბალღივით გული მეპარება, ბიჭებო!

— ყველანი ეგრე ვართ, ზაქროჯან. ეგრე! — დასტურს სცემენ სხვა მუშები.

X. უკანასკნელი

ვაშაა! — სამხედროთა შეძახილი.

თამამშევი — გვერდზე უდგას მ. ო. — ლენგს სჭრის. კრიჭი. კრიჭი.

ყოჩი ქალაქელნი: დიდებულად.

ტურფანი: ელეგანტურადაც.

მე, დავითა: აჰა, გვაქვს ოპერა. სილ ვუ პლე!

1999-2000

გვრიტები ანუ ფურცელი ქართული ნილილიზმის ჰისტორიიდან

ამათ დედაშვილობა ჰქონდათ ტკბილი რა, ჩაროზი.
უსაიდუმლო.

სერგიაზე რო იყო შეყვარებული, ეგეცა უთხრა დედას
მელანია.

— ჩვენი ბატონი როა, შვილო? — ჩაფიქრებითა სთქო
დედაკაცმა.

— მერმე და რა, დედი, სიყვარული ძლიერია
წყალივით, შემნიშნოსა და

— წყალივითაც ჩაივლის, შვილო...

აბა, როგორ აჯობებდა მელანია დედას ანდაზა-თქმუ-
ლებების ცოდნაში?!

ძველი ქალი იყო ეთერ.

— ნუ იღელვებ, დედი.

— დედა ვარ შვილო, დედა! აჰა!

ე, იმ დროს ქართველთა წარჩინებულ ოჯახებში ჩაი
და ლოტო იყო მოდურ.

არცვისზედ ნაკლებად ითვლებოდნენ ესენი, ფალავები.

ჩაი შემოიტანეს მსახურთა, ჩამოარიგეს ფინჯნები და
გავიდნენ, ციმციმ.

— მიყურებდა, დედი, მიყურებდა, მამ, ორთავ თვა-
ლით, შეჰნიშნე?

გაუცრუვა იმედი დედამან:

— ვერა.

შავი, ინდური ბაიხისა იყო ჩაი.

მტააპ, გემრიელი.

ლოტოს ტომარა ბაბუცას ედო ცხვირწინ. ის იყო გამ-
თამამებელი. და სერგიას დედაც.

სვავდნენ ჩაისა სვენებ-სვენებით, ნება-ნება, თანაც ბა-
ასობდნენ სალონური წესით; დინჯად. იმჟამინდელი ლი-
ტერატურის გამო.

— კნენა ბარბარა ჯორჯაძის პომედასა ვკითხულობდი,
შუამთის მონასტრის მწირი ჰქვიან, დიდებულად გარით-
მული რამ თხზულებაა, ძვირფასო ბაბუცა, — ანანიაშ-
ვილმა თქვა ქეთომ.

ბაბუცას თავისი ანგარიში აქვს: ამ რჩხია-ქლენ ქვე-
ყანაზედ ქეთოსებრ ჭკუიანი და ლამაზი ქალი არ ეგულ-
ვის, მზითვსაც რო ბარაქიანად ატანს გვარი...

— ვიცი, შვილო, დიდი განისა და ნიჭის პატრონია
ბარბარე, — თავშეკავებით გაიცინეს. ძმა ჰყავდა ბარბა-
რეს რაფაელი, პოსტი ეჭირა იმ დროს მაღალი მთაში. —
შენ რაით სდუმხარ, შვილო სერგია. შენოდენა წიგნი არც
ვისმეს უკითხავს ჩვენში.

სერგია შეიშმუშნა, დაიფშხალა.

— აჭარბებ, დედა ძვირფასო.

— ნუ თავმდაბლობთ, პეტერბურლში განსწავლული
ბრძანდებით. — ქეთომ ღიმილი მოაყოლა სიტყვას, გამამ-
ხნევებელი, ამნთები.

— ეგ მართალია, — არ უარპყო თვისი ნაპეტერბურ-
გელობა სერგიამ, — მე იქ პისარევი გავიცანი. უპირველე-
სი მოაზროვნეა ევროპიისა (არაა მცირე მასშტაბი, ბოზიშ-
ვილი ვიყო).

— მეძახის, გესმის, დედი, მეძახის! რაი უნდა ნეტა? თავ-
სლათეს ხო არ დამასხავს იმოდენა ხალხში? გავიდე? მითხარ

რამე, კრინტი დასძარი, დედაკაცო! გესმის, როგორის ხმით მიხმობს; ყვირის, ღრიალებს, ხავის.

— ბატონია ჩვენი, შვილო.

— მივდივარ დედი, მივდივარ!

კაბა-წინსათარი გაისწორა.

ერთი პირჯვარი, მეორე პირჯვარი, ჰო, სამობითაა! მესამე პირჯვარი.

ხელით ხელი დაუჭირა სერგიამ მელანიას.

— ჩამორჩენილნო! სხედხართ აქა და უბნობთ გამო სისულელთა. კნეინა ჯორჯაძე, ტოჟე მნე არისტოტელე! ნუთუ განცდა არა გაქვთ, ნუთუ გულები მოგიკვდათ, რაი გჭირთ. დალპა თქვენი ტვინები? გაზღმურდლდა? გასათელია თქვენი ტრადიციები.

— აი ეგ ბოლო სიტყვა კი ღვთის წინაშე ვერ გავიგე. ამიხსენ, შვილო, დედაშენი ვარ!

— ფუჰ თქვენი... მე მელანია მომყავს ცოლად. არც ჯვრისწერა გვინდა და არც ქორწილი. ტყეში ვიცხოვრებთ. თანახმა ხარ ხომ, გენაცვალე?

მელანიამ გონი დაჰკარგა, იატაკზე გაიშხლართა შველი, უშვერი ალაგი გამოუჩნდა, მუხლი!

დაუფარა სერგიამ.

— გააბედნიერე თუ მოჰკალი გოგო, შვილო? ეთერ, გოფმანის კაბლი მოიტანე!

— ტყეში ცხოვრება ნებისმიერს გააბედნიერებს, ჩემო, — სთქვა ქეთომ, — მე წავედი! (უნდა ქვეყანას გააგებინოს, ჰირიმე).

— წადით, წადით ყველა, ო, მელანია... ჩაუქროთ სანთლები, ჰუჰ, ჰუჰ.

სიმღერა მევლუდზე — ახალი

პარმენ ლორიასადმი

ჰე, ჰე, ჰეე...

კანონის და სალონის კაცი არაა მევლუდი. ყაჩაღია: იარაღში ზის. საუკეთესო ცხენი ჰყავს — ლაფშა. გზები, ჰო, ზეპირ იცის, დააბრმავე, მაინც მიაგნებს სამალავს. გლებობას არ აწუხებს, იცის მათი ყოფა იწრო, გაზინტლული. ქალაქიდან გამოსულ ფოშტის ეტლებს ეცემა, ძარცვავს კარეტებს დიდებულთა, საეკსკურსიოდ გამოწყობილ დამებს სტოვებს სადად, უსამკაულოდ.

ბათუმში დომხალია. სავსეა ქალაქი სპეკულანტებით. კონტრაბანდისტები დაძრწიან ჯგროდ. საქონელი გაგროშეაპიკებულია. ჰყოფნის მევლუდს ფული.

მსროლელადაც ვარგა მევლუდი. ნაძაღლარია, ჩაფრად იდგა პოლიციაში ერთხანს. როცა გაბეზრდა სამსახურით, მიატოვა, დაჯდა სახლში. იწყო მიწის თოხნა სხვებივით. ვერ ეგუა, ამბავიც შეემთხვა — კრიმინალი — და გავიდა ტყეში. გაფირალდა.

სროლას ჩაფრობაში შეეგუა, დაამხეცა, ახლა შვიდი ტყვიით შვიდ ცალ კაცს მიაწვენს, დედებს უტირებს!

მარტოობა — განა მართლა კაცთა ხვედრი. განეწყვე — სძულს მევლუდს. ფიქრი იცის ოხერმა, ფიქრი კი ზღუდავს, ჰბორკავს მევლუდს. არადა საქმე აქვს მოსაყომარებელი. დიდი რამ საქმე. ოთხგნით განთქმული

მენტეშოვის ქარხანა სურს წაიღოს, გაბრღვენას მისი არტელი, გააცარიელოს.

მითხარი ახლა, ჯიგარო, როგორია ასრეთი კაცისთვის ფიქრი გამო: სიბერის, მამალი წელკავის.

როგორია?

ამალა რჩეული ჰყავს მევლუდს. ექვსი კაცი, ტყვიის ტყვიამი დამჯენი, როგორც რო იტყვიან.

იმათ ელის აწ.

მენტეშოვი კაცია ოქრო. საათი ოქროსი, ოქროსივე კბილები (უაილდი — პარიზში, ეგ ბათუმში აბრუებენ საზოგადოებას). თასმის წვერებიც ამისავე. მარცხენა ხელის არათითზე ჩამოცმული ბეჭედი-თილისმა ძვირფასის თვლით ოქროსი. მენტეშოვი კაცია, მაშ, ოქრო.

ერთი გოგო ჰყავს: კოჭი იმას არ უვარგა და ბარძაყი. საყულოდ დასტრიალებენ აფიცრები. უღვაშებს იგრეხენ, გათამამებულნი ოცნებრივ.

მენტეშოვი კაცია ოქრო, მაგრამ ზნეობის საკითხში — რკინა ხალიბური. დაჰფოფინებს, უფრთხილდება როგორი შრომით მოპოვებულ სახელს.

გოგოს მამისერთას (არა, არსად ჰყავს — გულზე დაიდებს ხელს — სხვა) ეს არ ესმის. იკითხა ვილაც ჰიუგო და რუსო — ესე ფრანგნი და ეცინება ეხლა მამის დარიგებებზე.

— შვილი მიტრაკებს და კურიინაია სლეპაგა. სხვა ყველაფერი კარგადაა, ცხონდი დედაჩემო.

გეგმა-ფლეგმა არცერთი იცის მევლუდმა. პირდაპირ დაეცემა მენტეშოვის იმპერიას, უგეგმოდ. გული ერჩის დღეს ნამეტურ.

აფიცრები ართობენ მენტეშოვის ქალს.

ერთი.

მეორე.

მესამე.

სამხედრო წესად დადგენილი ამბავია უფროსის მორ-
ჩილება.

კაპიტანი: წარმოიდგინეთ ესე იყო.

პორუჩიკი: ნამდვილად.

პოდპორუჩიკი: ზუსტად.

ჰა,ჰა,ჰა.

მოწრუპეს შამპანური.

პოდპორუჩიკი უჩურობს პორუჩიკს: ჩვენი, ყაზარ-
მული ანეგდოტი რო მოგყვებ, ყაზარმული, შეიძლება?

— არაო, — თავი გააქნია კაპიტანმა. ქალიშვილისადმი
კი ესე თქვა:

— გავკადნიერდები, მადმუაზელ, და ერთ ჩვენებურ
ანეგდოტს მოგიყვებით.

— გთხოვთ, კაპიტანო, ანეგდოტი ხომ ძაან ცხოვრები-
სეული რამეა.

ზარი აზრიალდა ამ დროს ელექტრო.

ბედი არ გინდა!

— მამაჩემია, — იწინასწარმეტყველა მენტეშოვამ.

დაიძაბნენ.

მენტეშოვის ქალმა ატეხა კრუსუნი.

„უხდება“, — გაიფიქრა პოდპორუჩიკმა.

ოთხივეს ესმა საკეტის ტკაცუნის.

მსახური შემოვიდა და მოახსენა ღიასახლისს:

— სამსახურში დარჩება ღლეს მამათქვენი. შიკრიკმა
მოიტანა სიტყვა.

დასცხეთ მუზიკა!

წინასწარმეტყველებათა დრო წავიდა.

ჩამორჩენილობა ძირს!

ფლურს ითვლის მენტეშოვი. უყვარსო, — უთქვამთ.
აწყობს დასტა-დასტა რუბლებს. ჰარიფი არაა, ფულის ხა-
მი. უნახია. წყნარადაა. ეს კია: მზერა აქვს დაძაბული.

— კურინნაია სლეპატა, ფუ, — სთქვა და გადადო დას-
ტა ჩერვონეცების სქელი.

აბა, მე რომელი მენტეშოვის ტოლი კაცი ვარ, ჯერ
რო არ გავვოცდე, პლატონ ჩემო, და მერმე არ შემშურ-
დეს, რამოტენა ფულის პატრონია ეს კონჩოლი.

მეც მინდა!

იბრაჰიმ — გვერდზე მიჰყვება მევლულს — იტყვის:

— გავჩერდეთ ერთ წუთს.

მევლული აღვირს მოქაჩავს. ცხენი — მორჩილი —
თავს მოატრიალებს, დადგება.

— სათქმელი გაქვს რამე?

— ჰო, მე მარქსისტი ვარ, — ამაყია იბრაჰიმ, — წილს
ვითხოვ ორმაგს.

— მარქსს ცალკე და შენ ცალკე, არა? — ილიმის მევ-
ლული.

— არ მეხუმრება, მევლულ, — ხელს წაიღებს მარჯვე-
ნას მარცხნივ იბრაჰიმ. ნაგანი ეგულება იქა (გინახია, რა
თქმა უნდა, ყოჩ-ბიჭური ფიშტო ესე), — დიდი კაცია
მარქსი.

— ყიურია იგი. უჩვენოდაც ექნება ფული, — ილიასი
ამბობს, ყაჩალია ისიც.

ღმერთი-რჯული.

— ანტისემიტი ხარ შენ, ოშტოყლარო, — ნაგანს დააძ-
რობს იბრაჰიმ.

— ჩაიდე, ბიჭო, მაგი იარალი და დაგვტოვე, აუცვი
აქედან, პეტერბურგში ჩადი, შენნაირ სწავლულ კაცთა
აღაგია ის, იბრაჰიმ ამხანაგო!

ატყდა სიცილი მევლულის სიტყვის გამო.

— მოგკლავ, ღორიშვილო!

— სამში გრძელს წაიღებ, შეითანო!

ბუჰ!

დაასწრო მევლუდმა — სხარტია, რა — სროლა. მოიკეცა
იბრაჰიმ, დაეშვა, დაებერტყა მიწას, ხავის. დავუთვალეთ:
ერთი,
ორი,
სამი,

Out.

გათავდა.

თვალეები ილიასმა დაუხუჭა. დაჰხარეს თავები.

ნაგანი იბრაჰიმის მევლუდს მიართევს!

მენტეშოვმა სეიფი ჩაკეტა. ბულალტერი იხმო.

— მზათაა საბუთები, დანილა?

წითური კაცი შემოვიდა ოთახში. ქალღლები დადო
მაგიდაზე.

— შეამოწმეთ, ბატონო, — სთქვა თავში დარწმუნე-
ბულმა და გავიდა.

— არა, ეს რიჟა უნდა დავითხოვო. დავილალე კაცი, —
ყვერებზე დაიდო ხელი, შეხტა. სამჯერ, სამჯერაც ფუ,
ფუ, ფუო, — თქვა.

ჰაი, ჰაი, რო არ იყენენ მაშინ პაპარაკები.

არ უშველა შელოცვამ. ქე დაადგა ათ წუთში ის მევ-
ლუდი.

— წარმოების გაჩაღება იხსნის საქართველოსა, პატი-
ვი ვცეთ მეწარმეთა, გაუფრთხილდეთ მათ. თ-მა ილია
ჭავჭავაძემ მითხრა ესა ტფილისში, გაზეთ „ივერიის“ რე-
დაქციაში შევხვდით, — მენტეშოვის გოგომ ღლიური და-
ხურა, — აი ესე მოსაწყენად ცხოვრობს ჩემი მამა,
გრძნობთ, როგორ მარტო ვარ, კაპიტანო,

ო, ჩემო კაპიტანო!

ილიას გზის მოწინააღმდეგე (ვაჰმე!) ორნაგანიანი (გა-
ვისუსო სჯობს, არ ღირს ხმის ამოღება!) მევლუდი კარს
ფეხით მიხურავს:

– ფული ჩქარა!

მენტეშოვი თავს ასწევს.

– ვინ ხარ!

– ყაჩალი.

– ააა, ახლავე გენაცვალე, ახლავე, – წამოდგება მენტეშოვი (კაცი-ოქრო!), სეიფთან მივა, გააღებს. გამოიტანს ფულს. „ოხ, რიჟავ, შენ დედას დაუთმე მე!“ – გულში დაატრიალებს ბრავს.

მეკლუდი მაყუთს დაითრევს (ბევრია!) და გამჟება.

მენტეშოვი ჯდება.

ეხ, ბუღალტერო, დარჩი უსამსახუროდ!

გაუძელ, იახში!

თხრა და გადამწერლობა

1

თხრიან. ებრძვიან მიწას — უძლეველს — ნიჩაბ-წერაქვე-
ბით. ეძებენ გამუდმებით. პოულობენ ხანდახან: თასებს —
მათით სმიდა სარიბ-თავადი ღვინოს. სამკაულებს — იგი-
ნი ამშვენებდნენ თავადის თავისთავად ამპარტავანი მე-
უღლის ყელ-კისერ-მკერდს, მაჯებს. უფრო ხშირია უბ-
რალო ნივთნი ყმა-მსახურთა.

საუბარში ჭეშმარიტება იკარგება, ჰქრება კამათში.
იციან ეს და სდუმან, ყუჩად არიან. ჰფუთავენ ნაპოვნს
კოხტად და ჩქარა ავტოთი აგზავნიან თბილისში. იქ ისა-
უბრებენ. იკამათებენ იქ სხვები. ოღონდაც!

თვის წინ ჩამოვიდნენ აქ: წარუდგინეს გამგებელს
გათხრების ნებისდამრთველი ქალაღდი და, რაღაი მუშე-
ბისთვის მისაცემი თანხა არ ჰქონდათ, თავადვე დატრი-
აღდნენ. აგვისტოა, მარიამობისთვე ძველებურად, შუა.
ცხელა ღამითაც, კარვებში სძინავთ.

მოსაწყენი რამ საქმეა მაგიანეთა კითხვა. კირკიტი
ძველ რუკებში, მაგრამ ამათთვის აუცილებელი. მერვე
საუკუნის მაგიანეშია მოხსენიებული ცოლ-ქმარი: სარიბ
— ვით მარჯვე მეხრმლე მტერსშეკვდომილი, ხოლო ჰანი-
ფა — „ქალი შვენიერი. მჭრუეტელი ცხოვრებისა ფრიად
გონიერ“, ვინაც „სწერდა თვისსა განცდათ გრძელთა ღა-
მეთა შინა“.

— ბატონებო! ისტორიკოსებმა სჩითეს არქივები, მოიარეს ეკლესია-სალოცავეები, შეამოწმეს ტაძრები ამოდ! ვერსად მიაკვლიეს ჰანიფას დღიურებს. არ შემორჩენილა ალი-კვალი მათი. ჩვენ უკეთეს მდგომარეობაში ვართ, ბატონებო, ცოლ-ქმრის სასახლე-საცხოვრებლის ნახატი მაინც გვაქვს სავარაუდო. არქეოლოგია ერის მატერიალურ კულტურას იკვლევს, — განაცხადა ბანკეტზე (ბიჭებს აცილებდნენ) პირველმა არქეოლოგმა, ინსტიტუტის შეფმა. მერე მშვიდობიანი გზა და წარმატებული მუშაობა უსურვა ბიჭებს და სახლში წავიდა, მიატოვა სუფრა, ხალხი.

ეჰ, ცოლი ჰყავდა აშარ-ანჩხლი, მთვრალ ქმარს სახლში არ უშვებდა... ეჰ (მეორედ).

2

შვილო ტერენტი, ჩვენთან არს ღმერთი!

ამაყობს, შვილო, სოფელი შენით! შეიმედება, ხანდახან მაინც მიგონებ მე-უბედურს. მაშო და ზოზია კარგად არიან.

შვილო, დამჩაგრეს ბოლშევიკებმა. გამაპარტახეს. დაერივნენ და თავები დააყრევინეს ჩემს იხვებს, ბატებს, კვატებს, ქათმებს, ინდოურებს. ყელი გამოლადრეს გოჭს — ჩემს ერთას. მერმე გაპუტეს და გატრუსეს ავლა-დიდება ჩემი, წამოაცვეს შამფურებზე, დაატრიალეს ცეცხლზე, თეთრი ხორცი თვითონ სჭამეს (შხამად და ნავთად!), მე გოჭის ყურები ჩაეკვნიცე. მეგემრიელა ჭეშმარიტად! ისე, მთლად უნამუსოები არ არიან — აჯიკა თავისი ჰქონდათ.

ძალა არაა თავს ზეით, შვილო. მოხუცი ვარ მე უბედური, უღონო. ბუნტოვნიკობა ჩემი საქმე არაა.

ახლა უიხვებოდ, უბატებოდ, უქათმებოდ (ვაი, დედაჩემო!) და ა. შ. დარჩენილი მთელს დღეებს ჩვენი ეკლესიის საწიგნეში ვატარებ. ვკითხულობ. რამდენი რამ ბრძნული წიგნი მქონია წაუკითხავი მე-უბედურს.

მალე ალბათ გამაძევებენ მე-უბედურ ღვდელსა ეკლესიიდან. კულტურული განვითარების მიზნით კლუბად გარდააქცევენ ეკლესიას. სიმართლე უნდა ითქვას: ახალგაზრდობა მომხრეა. კინო ურჩევნიათ ლოცვას. ფუი, ფუი, ფუი!

ამას წინ, შვილო, საწიგნეში ვიქექებოდი. საკითხავს ვარჩევდი. გული-ცოდვილი — ვერცრო ამოიჭრი, გვა-ცოცხლებს: იხვებს, ბატებს, კვატებს, ქათმებს, ინდოურებს და გოჭს, ჩემს ერთას — დარდობდა. სივდებოდა. გახეთქვაზე იყო ოხერი, მაგრამ უფლის ნებაა სულიერის დაბადება-სიკვდილი, შვილო!

მოკლედ, ვიქექებოდი წიგნებში გულდასიებული და სრულიად შემთხვევით (ღვთის ნებით ესე იგი) ქალაღებში მომხვდა ხელში. გიგზავნი, შვილო, ამ ქალაღებს, ვილაც ჰანიფას ჩანაწერებია (ჩვენი წარსულის გამოჩენილი სახელი რომ იყოს, მეცოდინებოდა). მიკვირს ნამღვილად, მამა მიხეილმა როგორ ვერ იპოვა. ის ჩვენ ეკლესიაში მუშაობდა ერთხანს. მე ნინველი ვიყავ მაშინ. მახსოვს ეჩხუბებოდნენ ავსულნი. რუსო, რუსოო. უწყალებდნენ გულს შეძახილით.

ლაზარე, 1922 წელი

არ მოგენატრა ჩვენებური დაისის ხილვა, ჩქიმსანთლო? ჩამოდი. ნახე!

წევს და ელის. დგას და ელის. დადის პალატაში და ელის. დასეირნობს ეზოში ჰაერზე და ელის მნახველს (ჩვენგან შორს!), სიკვდილს.

წერილებს სწერს დებს, მეგობრებს (ვითომ ჰყავს?)
თბილისში. ლექსებს აგზავნის რედაქციაში...

სუნთქავს...

საწოლის უკან რაფაზე დასტა დევს ფურცლების. ღამ-
ღამობით იღებს და შუქის ჩაქრობამდე (საგიჟეთის რე-
ჟიმი რეგენული!) კითხულობს.

პანიფა — მოსწონს ეს სახელი. ტექსტი რა თქმა უნდა
დედანი არაა (ვინ იცის, მერამდენე ვერსიაა; როგორი შე-
მოკლებულია ან თუ განვრცობილია, როგორი; წარსული
სივრცეა უდროო; ვერ დამყარდება იქ წესრიგი!)

მერე ლექსებს წერს. მართლა იტანჯება გამოგონილი
მარტოობით...

ლ. ა.

(დასაწყისი მესამე გვერდზე)

ვერაფრით გაერთობა აქ ქალი, მარტო ჭორობით. ჰაერი
ჩვეულებრივია, თითქმის თბილისური. ვსხედვართ აივან-
ზედ. ვსაუბრობთ. ჩემი დიასახლისი ებრაელია — ცნობილია
ებრაელთა სიმრავლე სურამში — საგიჟეთში ექიმობდა ად-
რე. ახლა 82 წლისაა, სახლში ზის. შვილები, შვილიშვილე-
ბი თელ-ავივში ჰყავს. ეხმარებიან იქიდან შეკელებით.

ხმის გამცემი მჭირდება ფულზე მეტადო, — მითხრა
შეხვედრისთანავე. ქირას ცოტას მართმევს.

მიყვება ძველ ამბებს. ძირითადად საგიჟეთისას.
გრანელი ყოფილა მათთან დამწყვდეული. წყნარი ბი-
ჭი იყო, კარგი. იშვიათად სძრავდა კრინტს. ლირწი
ქცევაც მახსოვს მისი: ჩეკისტებმა გაჩხრიკეს საავდმყო-
ფო ჩვენი. წაიღეს ყველაფერი. ყველაფერი ხელთმობ-
ვედრილი. ტერენტის ფურცლებიც. სიტყვას მართალს
ფასი ჰქონდა მაშინ, სდევნიდნენ. გაიძრო ტანისამოსი,
ტიტველი დარბოდა ტალანში. ღმერთო, როგორი გამ-
ხდარი იყო საწყალი. გააჟრიალებდა მნახველს. ერთი

ფურცელი გადავანარჩუნე, მოვპარე რეგვენთ — ტყვილია, შვილო, ტყვილია. არადა ამტკიცებენ, ვითომც დიდი ჭკუიანნი იყვნენ სახელმწიფოს კაცები. თოფი უჭირავთ ხელში მაგათ (მაგრად უჭირავთ), განახოთ?

სახლში შევედი. მომიგანა ფურცელი. გადავიკითხე, ვთხოვე ეჩუქნა. უარი მითხრა.

— მაშინ მომყიდეთ, — გავწითლდი.

— გადაწერეთ თუ გნებავთ.

რა მექნა? დავჯექი და გადავწერე. აი რა გამოვიდა:

ბედი აქუს თვისი ღმერთს და კაცს. იალონს ვასწრებ აღგომას და ცის გამრუმებამდის გავყურებ გზას. არავინ სჩანს, ომი წყეული! ჰო, ღმერთო იესუ, შენი არგამოგონილი რამ საქმენი მძლავრობენ მიწის-ზე!

იონა მსახური შენი და მოძღუარი ჩემი მიწიერი სიტყვით თვისით ამაგრებს გულს-ჩემს-ღონდლოს.

გესიტყუები შენ ყოვლის გამგონს, მცოდნესყოვლისას. განა შენ არ მომეც გული ესრე მამაკაცური დიაც ჰანიფას, აღელვებს მას სიოც არსაშიში.

ჰე, იესუ კეთილო, მრავალ არს მოთაყუანე ძუელთა კერპთა, ყოფიერობენ იგინი გალაღებულად, ხოლო მე მონაი შენი, წრფელ მონდობილი შენზედ ვიტანჯვი!

არ გთხოვ, ღმერთო ჩემო, საქმეს ესრე შენეულს. არ გთხოვ განკითხუას განლაღებულთა! გეაჯები ოდენ გამო ჩემი მეუღლისა. დამიბრუნე ომში წასული მრთლად!

გაწყალდნენ თუალნი შენგნით ბოძებულნი საპკრუეტად ზეცისა გზის ცქერაში, მტუერს ხედვიან იგინი გარნა.

ღმერთო უბრალოვ, განა შენ არ ესიტყვებოდი უწინ ადამიანთა, თუცა ცოდვილნი იყვნენ იგინიც ჩემებრ, რაით სდუმხარ აწ!

იონა მსახური შენი და მოძღუარი ჩემი მიწიერი
ეზოსშინ დატაბუცობს. ჰლაღადებს ლოცუათ. თან თუალს
მადევნებს, თუალსიმედიანს.

დიდი მეოცნებე იყო ჩვენი ტერენტი. საჭირო როა უშიშ-
როების არქივის დაჩხრეკვა, დამეთანხმებით: ღვთის წყა-
ლობით იქნებ ვიპოვოთ სხვა ფურცლებიც...

(გაგრძელება იქნება)

გაზ. „ახალგაზრდა ივერიელი“

1991 წლის 20 ოქტომბერი

— ამხანაგო პოლკოვნიკო, დოკუმენტები გაზიდულია!

— ძალიან კარგი! რაღაც-რაღაცეები დატოვეთ ალ-
ბათ?!

— რა თქმა უნდა! მოგეხსენებათ, როგორნი ვართ ქარ-
თველები. გვსურს ყოვლისმცოდნეობა.

— თქვენ ქალებიც გსურთ ერთი დღით! ეხლა კი საქ-
მე, რჩები?!

— დიახ, ჩემს ერთან!

უშიშროების კომიტეტის შენობას ცეცხლი მოედო!

სპეც. საინფორმაციო გამოშვება

1992 წლის 2 იანვარი

3

თხრიან, ებრძვიან მიწას უძლეველს ნიჩაბ-წერაქვებით.
ეძებენ გამუდმებით, პოულობენ ხანდახან. ჰპოულობენ
ყველაფერს რაც ძვლებზე მაგარია და გამძლე. რამე-
რუმეებს.

დარჩენილნი

⌘

პური ნაკამი, ღვინო დაღეული ჩაშხამდათ. წამოიშალ-
ნენ. ყარაჩოხელობდნენ ჭირშიაც, მაგრად იღვნენ.

ბიჭს კი მათთან მეხად მოსულს ახარებდა ყურადღე-
ბა ამოდენა კაცთა, ჰყვებოდა:

— ეგრე საათის წინ ჰნახა რა მამაჩემმა მხატვარი ნი-
კალა თავის ბინაში მკვდარი.

ვაააჰ! ჭირი და ღოზანა სიკვდილს, ყველა მიჰყავს
ოხერს განურჩევლად!

დაიძრა ჰამქარი!

— აბა წარსულის მოგონება არ იყოს, არ გვინდა ძერ-
წაობა განავლით, ძმებო! კაცნი ვართ! — ჰაჯიამა სთქვა.
ის იყო ჰამქარის სული და გული, კუნთებიც სხვებზე
მსხვილი ჰქონდა, — უნდა გავაპატიოსნოთ ნიკალა წესი-
სებრ.

უნდა! უნდა! უნდა!

აჩქარდა ჰამქარი!

ხალხი დაჰხვდათ — ზღვა. გატლეკილი ხალხი, უბრა-
ლო, გულისმქონე. ვალდებულნიც იყვნენ: ერთი, ორი...

II.

სკამები სახელობითი იყო. მონახეს სტუმრებმა (სულ რჩეულნი იყვნენ მაშრიყ-მალრიბიდან. ურთიერთობდნენ ფრანციკულის ენით) თავთავიანთი. მოერგნენ.

თამაღობდა კაცი გერმანთა ქვეყნიდან, ლაპარაკობდა მოკლედ, სვავდა ცოტას, საზომისაებრ.

— ქართველი ერი თავისუფალი გახდა!

„როგორ მოულოდნელად მერე, — ჰფიქრობდა (ფიქრი, ჰო, ყველას თავისი აქვს, მძიმე თუ სუბუქი!) ნოე, — ვინ არ ვყოფილვარ წარმოსახვაში: მექარხნე მიუნხენელი, ჟორესი, ქრისტე კვლავმოსული, დონ ჟუანი, მაგრამ პრემიერ-მინისტრი არაოდეს, არადა ვარ, მამაძალი!“

— და უმთავრეს: ჩვენ თქვენთან ვართ აწ და მარადის!

(ტაში ხანგრძლივი, — გაიფიქრა ნოემ. ან თუ ინატრა ნოემ)

აუხდა...

III.

არ დაანება ჰაჯიამ ქალებს: თვითონ, თავისი ხელით დაჰბანა გვამი. ნიკალ, როგორ დამძიმდი, ბიჭოო... მერე შემოსა, დაჰვარცხნა თმა-წვერი. სტიროდა.

IV.

აამოძრავა ღირიჟორმა ხელები. აათამაშა. აქლერდა ორკესტრი. შტრაუსი-ვალსი.

დაწყვილდნენ მესუფრენი. ნოეს ერგო მომრგვალო ქალი, სიგანეში წასული. მეუღლე-ცოლი ბრიტანელი საქმოსნისა. ბიზნესის დასატრიალებლად იყო ჩამოსული ინგლისელი ჩვენთან საქართველოში.

მოეხვივნენ ერთურთს, დატრიალდნენ. ეხერხებოდა ნოეს ცეკვა, შემოევლოს დედა!

V.

გაიშალნენ ჰირისუფალნი, გზა მისცეს მეკუბოვეს. საქმის მცოდნე იყო დიდი არტამა. ხელი ჰქონდა ბაჯალლო.

შევიდა ოთახში. როგორ ღარიბულ ოთახში, კაცოო.

— სიცოცხლე ჰაჯიას.

— შენც ეგა, არტამ.

— ჰაჯიაჯან, მასალის ფულს ავიღებ მარტო. ხელობა ფეშქაში იყოს. მიყვარდა, იცი შენ, უბედური, — სთქვა არტამამ და გაშალა მეტრიანი.

VI.

— მადამ მარგარიტ, — ეჩურჩულებოდა ნოე ქალს, წვერით ეხებოდა მის ლოყას ფუმფულას, — მოგწონთ ქორჟია?

მადამ მარგარიტმა თავი გადასწია უკან, გაიღიმა:

— მე პირველად არ ვარ თქვენთან!

— როგორ? — გაოცდა ნოე. ცეკვაც კი შეწყვიტა, მხოლოდ წამით.

— როგორდა ისე, ვცხოვრობდი მე აქ ადრე.

— მომიყევით, მადამ მარგარიტ, გთხოვთ.

— სხვა ღროს! ეჰ, ცოტა ახალგაზრდა რომ იყოს, მუსიო ნოე, დაგპატიჟებდით ჩემთან ოთახ-კიდობანში.

აი სიტყვებმა ხო ააღზნო ნოე, მაგრამ საკუთარი ლაჯების შუა ქალის ხელი რო იგრძნო, გადაირია მთლად.

არა, ე ივროპელნი სხვანაირი თამამი ხალხია! ჩვენი არ იყოს!

VII.

მეტრიანი დაკეცა. ჯიბეში ჩაიღო არტამამ.

— კაი კაცი იყო საწყალი ნიკალა.

— საუკეთესო, — დაუდასტურა ჰაჯიამ.

— ოღონდ ნამეტანი თვითრგული, გახსომს კაფეშანტანის ტუტრუცანას რო ჰყვარობდა, — გაიღიმა არტამამ, — სადაა ეხლა ნეტავ?

— თბილ ქვეყნებში, ჩემო არტამ, — სთქვა და კუთხეში ჩაჯდა პაჯია ჩვენი...

VIII

ღირიქორი ხელეებს იქნევდა; მარჯვენას, ჯოხიანს — შმაგად უფრო...

1999